



HO'OLU LĀHUI
Regenerating Oceania
13th Festival of Pacific Arts & Culture
Hawai'i 2024

MO'OLELO HĀLĀWAI O KE KOMIKINA NO KA HO'OLAULE'A NO'EAU A
MO'OMEHEU PĀKĪPIKA (FestPAC)

PŌ'AKAHI, 23 AUKAKE , 2021 HOLA 2:30'au

MA O KA ZOOM: 'AHA KŪKĀ MA KA WIKIŌ

Nā Lālā Komikina i kū mai:

Kalani Ka'anā'anā	-	Ke'ena Kuleana Ho'okipa o Hawai'i (HTA)
Maenette Ah Nee-Benham	-	Koho 'Ia E Ka Kia 'Āina
Snowbird Bento	-	Kaiāulu
Māpuana de Silva	-	Kaiāulu
Jarrett Keohokālole	-	'Aha Kenekoa o Hawai'i (hō'ea i ka hola 2:43'au)
Jamie Lum	-	Ke'ena Ho'omohala Waiwai a me ka Ho'okipa (DBEDT)
Richard Onishi	-	'Aha Lunamaka'āinana o Hawai'i
Makanani Salā	-	Ke Kūlanakauhale a Kalana o Honolulu
Hinaleimoana Wong-Kalu	-	Ke'ena Kuleana Hawai'i (OHA) (hō'ea i ka hola 2:3e'au)

Nā Hoa Kipa:

Jacob Aki	-	Luna Ho'oka'a'ike, 'Aha Kenekoa o Hawai'i
Amber Bixel	-	Hale Hō'ike'ike Bīhopa
Jackie Burke	-	Kaiāulu
Maka Casson-Fisher	-	Ke'ena Kuleana Ho'okipa o Hawai'i (HTA)
Iihia Gionson	-	'Ahahui Ho'okipa 'Ōiwi Hawai'i
Lynn Martin Graton	-	Kaiāulu
Keali'i Haverly	-	Kaiāulu
Dede Howa	-	Ke'ena Kuleana Ho'okipa o Hawai'i (HTA))
Ngahiraka Mason	-	Kaiāulu
June Matsumoto	-	Kaiāulu
Jayme-Lee Mokulehua	-	Kaiāulu
Malia Sanders	-	'Ahahui Ho'okipa 'Ōiwi Hawai'i
No'el Tagab-Cruz	-	Kaiāulu
Kanoe Takitani-Puahi	-	'Ahahui Ho'okipa 'Ōiwi Hawai'i

Nā Limahana:

Margaret Ahn	-	Loio Kuhina
Marlene Hiraoka	-	DBEDT

Timothy Tiu - DBEDT
Scott Tome - DBEDT

HO'OMAKA

Ho'omaka ka Luna Ho'omalulu 'o Kalani Ka'anā'anā ma ka hola 2:32'aiu ma o ke aloha 'ana aku i ka po'e ma ka ZOOM a Facebook Live.

Kāhea akula ka Luna Ho'omalulu iā Ms. No'el Tagab-Cruz no Hilo, Hawai'i, ua kono 'ia 'o ia e Mr. Onishi e mālama i ka wehena. He kanaka ho'olauka'i 'o Ms. Tagab-Cruz no I Ola Hāloa Center for Hawai'i Life Styles no ke Kulanui Kaiaulu 'o Hawai'i. He 'ūniki 'ailolo 'o Ms. Tagab-Cruz no 'Unukupukupu a me Hālau o Lilinoe.

'O ke mele a Ms. Tagab-Cruz i ka'ana ai, he pule pale ia e noi ana no ka ho'opalekana 'ana i ka po'e ma kēia wā o ka Ma'i Ahulau, me ka ho'opalekana pū i ke Komikina me kā lākou hana. Mahalo 'o ia i ke Komikina no kā lākou hana, me ka hāpai pū i ka mana'olana e palekana ka nui po'e, ka ho'ohanohano 'ia o nā kūpuna ma FestPAC, me ka mahalo pū i ka ho'olālā 'ia o kahi hanana ho'olaule'a e kāko'o ana i nā Kānaka Maoli o ka Pākīpika, me nā 'ōiwi o Hawai'i pū kekahi.

Mahalo akula ka Luna Ho'omalulu iā Ms. Tagab-Cruz no ke komo pū 'ana ma ka wehena.

'ŌLELO HŌ'IKE A KA LEHULEHU

Wehe ka Luna Ho'omalulu Ka'anā'anā i ka papahana i ka lehulehu e ho'opuka mana'o no ka papa manawa o kēia hālāwai. 'Oiai 'a'ohe mea i ho'opuka 'ia, ua ho'oholomua 'o ia i ka hālāwai.

'ĀPONO I KA MO'O'ŌLELO HĀLĀWAI 26 IULAI 2021

Ua nā'ana 'ia nā mo'o'ōlelo e nā Lālā Komikina. Noi mai ka Luna Ho'omalulu inā i pono e ho'ololi 'ia kekahi mea. Me ka 'ole o nā 'ōlelo kū'ē, noi mai 'o ia no ke koho pāloka ma o ke kāhea inoa. Kāko'o mai 'o Ms. Ah Nee-Benham i ia mana'o, kāko'o pū 'o Mr. Onishi i ka mana'o e ho'oholomua i ka hana. Ho'oholo ihola nā Lālā Komikina penei: Luna Ho'omalulu Ka'anā'anā, Hope Luna Ho'omalulu Salā, Ms. de Silva, Ms. Lum, Ms. Wong-Kalu, Mr. Onishi, Ms. Bento, Ms. Ah Nee-Benham.

Ua lōkahi ke 'āpono 'ia o ka mo'o'ōlelo hālāwai.

KA PALAPALA ULIA PŌPILIKIA A KE KIA'ĀINA E PILI PŪ ANA I KA MA'I AHULAU I KŪKALA 'IA MA 'AUKAKE 5, 2021, KUMUMANA'O C NĀ LULA NO KE KĀNĀWAI SUNSHINE

Noi mai ka Luna Ho'omalulu iā Ms. Ahn inā ua pono e kama'ilio hou aku 'ia kēia kumuhana. Noi mai ka Luna Ho'omalulu inā paha i loa'a he mau nīnau e pili pū ana i ka paukū C o nā lula ma ke Kānāwai Sunshine. 'A'ohe mana'o i ho'opuka 'ia, ho'omau lākou i kahi kumuhana a'e ma ka papa kumumana'o.

**KA NŪ HOU NO NĀ WĀ HUI I 'ĀPONO 'IA, ME KA HĀHAI PONO 'ANA I KE
KĀNĀWAI 103, KE KAU KĀNĀWAI O HAWAI'I 2021**

Hō'ike mai ka Luna Ho'omalū no ka pili o ke kumuhana 'eono a 'ehiku i ka Permitted Interactions Group (PIG). Ua hui he 'elua mau pū'ulu, a ua hō'ike mua 'ia ko lākou mau mana'o ma mua o kēia hālāwai 'ana. Wahi a ka Luna Ho'omalū, hō'ike mai kēlā me kēia palapala PIG i wala'au 'ia ma kahi hālāwai i ka 'ikepili no nā kumumana'o 'eono a 'ehiku.

**KŪKĀKŪKĀ & KE KOHO 'ANA I KA LUNA HO'OLAULE'A A ME KA
HO'OMŌHALA 'ANA I KA'AKĀLAI HO'OULU WAIHONA KĀLĀ**

'Ae akula ka Luna Ho'omalū iā Ms. Ah Nee-Benham e ka'ana hou aku no nā palapala PIG me ka pilina o kēlā me ka CEO/Luna Ho'olaule'a a me ke Kanaka Ho'omōhala Ka'akālai Ho'oulu Waihona Kālā. Mihi 'o Ms. Ah Nee-Benham no ka lohi o ka ho'ouna 'ia o kahi kāmua o ka wehewehena kūlana hana no ka CEO/Luna Ho'olaule'a a me ke Kanaka Ho'omōhala Ka'akālai Ho'oulu Waihona Kālā. 'A'ole i ho'omōhala 'ia he wehewehena kūlana hana no ke Kanaka Ho'omōhala Ka'akālai Waihona Kālā 'oiai ua mana'o 'ia e ho'okomo 'ia ana kēlā ma ka palapala kahua 'oihana. Noi 'o Ms. Ah Nee-Benham i nā Lālā Komikina e nānā lākou i nā palapala 'ekolu i ho'ouna 'ē 'ia iā lākou: (1) ka palapala mo'o'ōlelo mai ka hālāwai PIG; (2) he kāmua o ka palapala no ke kahua 'oihana i ho'omōhala 'ia mai ke kūkākūkā 'ana no ia kumuhana, me ka ho'ohana pū 'ia o ka puke alaka'i no FestPAC; (3) ke kāmua o ka wehewehena kūlana hana no ka CEO/ Luna Ho'olaule'a. Paipai 'o Ms. Ah Ne-Benham i nā Lālā Komikina e heluhelu i ia mau palapala, 'a'ole na'e e kia ma nā lāli'i o ka palapala. Inā nō 'ike 'ia he mau mea e ho'okā'oi ai, e wala'au nā Lālā Komikina me nā limahana o ke ke'ena, na lākou e ho'okā'oi i nā palapala a ho'ouna aku iā kākou ma mua o ka hālāwai hou 'ana.

Nīnau 'o Ms. Ah Nee-Benham i ka Luna Ho'omalū inā ua makemake 'o ia e ho'ololi i kekahi mea. Mihi ka Luna Ho'omalū no ka ho'oka'a'ike hewa 'ana no ka ho'ouna lohi 'ia o ia mau palapala 'ekolu. 'Oiai ua ho'ouna lohi 'ia, 'a'ole ana koho pāloka ke Komikina 'oiai 'a'ole i lawa ka manawa e heluhelu pono i ia mau palapala. E ho'opane'e 'ia ke koho pāloka 'ana i kahi hālāwai a'e.

Ho'opuka maila 'o Ms. Bento no ka Paukū 1, Ka Ho'omakakoho 'Ana I Nā Kūlana ho'i, hāpai 'o ia i ka mana'o e ho'one'e i ka helu #6 — “Ka ho'oka'a'ike, ho'olauka'i, a me ka hui mau 'ana me ka Luna a me ka Hope Luna Ho'omalū 'o FestPAC no nā 'ano kumuhana FestPAC like 'ole” – i ka helu #3, 'oiai, 'o nā kuleana i helu papa 'ia, hō'ike 'ia ka nui ko'iko'i o ia mau hana. Ua paipai pū 'o ia i ka ho'okā'oi 'ia o ka paukū i pili iā FestPAC 13, e ho'okomo 'ia nā mana'o pili i ke po'omana'o hou 'o FestPAC, me ka ho'olaha pū 'ia o nā lā hou no kēia hanana Ho'olaule'a. Nīnau akula 'o Ms. Bento i ke Komikina inā ko'iko'i ka loa'a o nā moho e ho'ā'o nei no kēia mau kūlana, i kekahi palapala kulanui iā ia, me ka loa'a pū i ka 'ike mai ka hana mua 'ana i kēia 'ano hana. Hāpai mana'o 'o Ms. Ah Nee-Benham me ka 'ōlelo, ua hiki paha ke koho ma waena o nā koina 'elua; he palapala kulanui, a i 'ole he 'ike ma o ka hana, 'a'ole e kauoha 'ia ka loa'a o nā mea 'elua i ia kanaka. Hāpai ka Luna Ho'omalū i ka ho'ololi 'ia o ka 'ōlelo penei, “e koho ke Komikina ma waena o ka loa'a o kahi palapala kulanui, a i 'ole, ka loa'a o ka 'ike ma o ka hana 'ana”.

Ho'opuka 'o Ms. De Silva no ka lawa 'ole o ka manawa e heluhelu ai i nā palapala, nīnau 'o ia i nā Lālā Komikina e hō'ike mai i ko lākou mau mana'o. Ua nīnau pū 'o ia inā loa'a he lā palena

pau no ka hō'ike mana'o 'ana no kēia mau palapala. Noi mai ka Luna Ho'omalulu i ke Komikina e ho'ouna mai i ko lākou mau mana'o iā Mr. Tome ma mua o 'Aukake 27, 2021, he Po'alima.

Paipai a'ela ka Luna Ho'omalulu i nā Lālā Komikina e 'aelike lākou a pau ma nā palapala PIG, me ka ho'okumu pū 'ia o kekahi Komikina Papa Luna Ho'okele, e hui ma'amau ai, he 'ehā lākou ka nui. Na nā lālā ma kēia hui PIG e ho'omōhala i laina manawa no ka hai 'ana i Luna Ho'olaule'a/CEO, ho'opau i ke kākau 'ana i ka wehewehena kūlana hana no ke 'āpono 'ia e ke Komikina, 'ohi'ohi i nā mo'omō'ali hana, alaka'i i nā nīnauele, a hō'ike aku i ko lākou mau mana'o i ke Komikina no ka moho kūpono no ke kūlana Luna Ho'olaule'a. Ke mana'o nei ka Luna Ho'omalulu e pau ke koho 'ana ma 'Okakopa 2021, me ka 'ae a hō'ole paha o ke kanaka i ke kūlana ma Nowemapa2021, i hiki ke ho'omaka i ka hana ma ka makahiki 2022. Ke paipai pū nei ka Luna Ho'omalulu e ho'ololi 'ia ka uku, i ka \$150,000 – 180,000 o ka makahiki, no 'ekolu mau makahiki hana, i hiki i kēia Luna Ho'olaule'a ke hana a hiki i ka pau 'ana o ka makahiki 2024; e kōkua 'o ia me FestPAC a hiki i ka pau 'ana o ia hanana, e kōkua pū 'o ia me nā loi helu kekahi. E pau kāna hana ma 'Aukake, ka wā e pau ai ka hana a ke Komikina, ma 'Aukake 2025. 'O kahi mea hou aku, e hai paha ka Luna Ho'olaule'a i ke Kanaka Ho'omōhala Ka'akālai Ho'oulu Waihona Kālā. He kuleana ia e kū ai i ka hana a ka Luna Ho'olaule'a. Ke hāpai pū nei ka Luna Ho'omalulu i ke ko'iko'i o ka palapala kahua 'oihana ma kā ke Komikina hana. He mea nui ka maopopo pono 'ana o ke Komikina ke ho'opane'e nei lākou i kekahi mau kuleana i ka Luna Ho'olaule'a, a nāna e 'auamo i ia mau kuleana, e 'ae iā ia e hana i ia mau hana.

Nīnau maila ka Luna Ho'omalulu inā he mau nīnau a mana'o paha kā ke Komikina.

Hāpai mana'o 'o Mr. Onishi, me ka 'ōlelo 'ana ua maopopo iā ia ka mea nui o kā ke Komikina kūlana ma kēia hana, 'o ia ho'i, ka ho'okele 'ana i ka hana. Ua pilikia mua ma muli o ka ho'okele 'ole 'ia o ka hana Ua 'ae ke Komikina i ka limahana i hai 'ia ma lalo o kahi 'aelike e ho'okele i ka hana no FestPAC, 'a'ole nō i ho'okele pono 'ia 'o ia e ke Komikina. He mana'olana ko Mr. Onishi 'a'ole hana hou 'ia kēlā hewa.

Mea mai ka Luna Ho'omalulu ke helu papa nei ke Komikina i nā alaka'i 'oko'a e kōkua ana i ka Luna Ho'olaule'a, na lākou e kōkua ma ka ho'okele 'ana. He mana ho'okele kā ke Komikina Luna Ho'okele, me ke Komikina pū kekahi, i hiki ke ho'okele pono 'ia ka hana a ka Luna Ho'olaule'a kēlā me kēia lā. Ua kūkākūkā pū ka hui PIG no ka pono e ho'omōhala 'ia o nā mana'o ho'okō a me nā hana pono e alaka'i ai i ka hana a ke Komikina. Nīnau ka Luna Ho'omalulu i nā Lālā Komikina e heluhelu i ka mo'o'ōlelo mai ka hālāwai PIG i mea e 'ike ai i nā mea e pono ai. Hō'ike pū ka Luna Ho'omalulu no nā mana'o hope ma ka mo'o'ōlelo, 'o ia ho'i, he paipai e ho'okohu 'ia he Luna Ho'olaule'a kūikawā, i hiki iā ia ke hana me ke Komikina Luna Ho'okele; he mau mea e no'ono'o ai.

Nīnau 'o Ms. Lum e pili ana i ka Luna Ho'olaule'a kūikawā, inā i pono e ho'okohu a hai paha 'ia i kēia wā 'ānō. 'Ae maila ka Luna Ho'omalulu, he pono ka hai koke 'ia. Mahalo akula 'o Ms. Lum i nā Lālā PIG no ka hui 'ana ma kekahi Po'aono, me ka ho'omōhala 'ana i kekahi palapala e alaka'i ana i ka hana.

KŪKĀKŪKĀ NO NĀ KAHUA HO'OLAULE'A.

'Ae akula ka Luna Ho'omalū iā Hope Luna Ho'omalū Salā e alaka'i i kēia 'āpana o ka papa kumumana'o, me ke ka'ana pū no nā mea i wala'au 'ia ma ka hālāwai PIG. Ua hui 'o Ms. Salā, Ms. Lum, a me Mr. Onishi ma 'Aukake 9, 2021. 'O ka pahuhopu o ia hui 'ana, 'o ia ka ho'ohāiki 'ana i nā wahi no nā hanana 'oko'a. Ua wala'au 'ia he 'elima mau wahi 'oko'a no kēia mau hanana: (1) ka 'Aha Wa'a (ka hō'ea 'ana); (2) ka 'Aha 'Awa; (3) ka 'Aha Wehena; (4) ke Kahua Ho'olaule'a; a me (5) ka 'Aha Panina. Ua ka'ana a'ela 'o ia i nā mea i wala'au 'ia me nā Lālā Komikina 'ē a'e.

No ka 'Aha Wa'a, ua kāpae 'ia 'o Kualoa 'oiai ua pipi'i ia wahi. Ua wala'au 'ia 'o Ala Moana-Magic Island a me Ke'ehi Lagoon, pono wale ke kūlanakauhale a me ke kālana o Honolulu e hō'oiā i ka pipi'i o ia mau wahi.

No ka 'Aha 'Awa, ua hāpai 'ia 'o Kūkaniloko. Ma muli na'e o nā hihia no ka nui po'e, ka manawa, a me ke ala kau, ua hāpai pū 'ia ka Hale Hō'ike'ike o Pīhōpa. Pono e 'imi 'ia ka pipi'i o ia mau wahi 'elua.

No ka 'Aha Wehena, ua ho'opa'a 'ia ka Hale Ali'i o 'Iolani, ke wala'au pū 'ia nei ka hana pū 'ana me ke Komikina Ho'olaule'a Kamehameha no ka 'Aha Lei, ka paikau, apwa.

No ke Kahua Ho'olaule'a — Ua wala'au ka hui PIG e pili ana i ka mālama 'ia ma waho a i 'ole ma loko, ua ho'oholo 'ia he 'ekolu mau papaha 'oko'a: (1) ka Hawai'i Convention Center; (2) Ala Moana — Magic Island; a me (3) Kapi'olani Pāka. E like me ka 'ōlelo ma mua, ua loa'a mua he kālā (he \$1.3 miliona ka nui) ma ke Convention Center. Ua nīnau 'ia inā ua hiki ke ho'ohana 'ia ia kālā no nā mea 'ē a'e, e la'a ho'i me ka 'ai'ē ho'olimalima, ka uku 'ana i nā kākā e hana ana ma lalo o kekahi 'aelike, ka mea'ai, a me nā 'ai'ē 'ē a'e paha. 'O nā mea maika'i no ke Convention Center, 'o ia ho'i ka nui lumi ma ke kaupoku i hiki ke ho'ohana 'ia no nā hō'ike'ike, hiki ke ho'ohana pū iā loko no nā 'aha 'oko'a, nā hō'ike ki'i'oni'oni, apwa.

'O ka lua o nā koho, 'o Ala Moana— Magic Island ho'i, e pono ana ke kākō'o mai ke Komikina Hoa Kaiahome mai. E pono pū ana e uku hou aku no nā mea ho'opalekana, no ka ho'ohana 'ia o nā hale 'oko'a, nā palapala 'ae no nā hale pe'a ma nā pāka, apwa. No Kapi'olani Pāka— e pa'akīkī ana paha ka loa'a mai o ke kākō'o mai ke Komikina Kapi'olani Pāka mai ma muli o ka nui manawa e noi 'ia nei. Pono pū e noi no ke kākō'o mai ke Komikina Hoa Kaiahome mai kekahi. He mau uku 'ē a'e ko kēia wahi kekahi.

No ka 'Aha Panina, 'o Kapi'olani Pāka ka wahi ho'okahi i hāpai 'ia, e pono ana he palapala 'ae mai ke Kūlanakauhale a me ke Kālana o Honolulu, me ka noi'i pū no ka pipi'i o ia wahi.

Mea mai 'o Ms. Lum no kona na'ana 'ana i ka palapala 'aelike me ke Convention Center. Hiki ke ho'ohana 'ia kekahi pū'ulu kālā mai AEG mai (ka po'e ho'olimalima) no ka uku 'ana i kā lākou mau limahana 'ai'ē mea'ai, nā 'ano uku no ka 'enehana e pono ai, apwa. 'A'ole pono e ho'ohana 'ia kēlā pū'ulu kālā no ka ho'olimalima 'ana i ke Convention Center wale nō. Ha'i mai ka Luna Ho'omalū, e like ana ke kumu kū'ai no ka ho'olimalima 'ana i ke Convention Center 'oiai he hale ia ma lalo o ka mana o ka moku'āina, a he pā'oihana kākō'o 'o HTA. E emi mai ana ke kumu kū'ai no ka ho'olimalima 'ana i ia wahi, a e mālama 'ia ke koena o ke kālā mai ke kākā

ho'olimalima no nā mea 'ē a'e. Ua ho'omaopopo mai 'o Ms. Salā i nā Lālā Komikina, he pono ko kekahi mau lāhui hō'ike'ike 'ana ma ka 'āina, inā nō 'aelike ka po'e ma ke Convention Center no ke Kahua Ho'olaule'a, e hiki ana ke ho'olālā pono no kēlā.

Ho'omaopopo pū ka Luna Ho'omalulu i ke Komikina no ka mālama 'ia o ka 'Aha Kukui Lana ma ia wā like, ma Ala Moana— Magic Island.

Ua mana'o mua 'ia na ke Kula 'o Kamehameha e kāko'o mai ma ka wā o ka 'Aha Wa'a, pono na'e e hō'oia hou me lākou.

KŪKĀKŪKĀ NO NĀ LOLI I KA MO'OHĒLU HO'OLAULE'A A ME KE KĀLĀ I HO'OLILO 'IA E PILI PŪ ANA I KA HAI 'ANA I LUNA HO'OLAULE'A A ME NĀ KŪLANA HO'OMŌHALA KA'AKĀLAI HO'OU LU WAIHONA KĀLĀ

Ua mana'o ka Luna Ho'omalulu he mea 'ole ka wala'au 'ana no ka mo'ohelu kālā i kēia manawa 'oia, ua hiki ke kūkākūkā a ho'oholo 'ia kēlā ma hope o ka hoo'oholo 'ana i kekahi mau mea 'ē a'e. Ua noi mai ka Luna Ho'omalulu i ke Komikina e ho'oholo 'ia ka uku o ka Luna Ho'olaule'a ma kahi hālāwai a'e. Mea mai pū 'o ia no ka mālama 'ana 'o HTA i kekahi pū'ulu kālā ma ka 'ao'ao ma o kekahi 'aelike me ka Native Hawaiian Hospitality Association (NaHHA), i hiki iā lākou ke kōkua me FestPAC, me nā hālāwai Komikina, apwa. E hiki ana paha ke ho'ohana i ia kālā maiā NaHHA mai, no ke kūlana Luna Ho'olaule'a no ho'okahi wale nō makahiki, a hiki i ka ho'omōhala 'ia o ke kālā mai ke Kanaka Ho'omōhala Ka'akālai Ho'oulu Waihona Kālā mai. Aia nō a pa'a ke ala ho'oulu kālā, hiki ke uku 'ia ma o ia mau kumuwaiwai.

Ha'i mai 'o Ms. Lum no ka loa'a mai o kekahi pū'ulu kālā li'ili'i maiā Stanford Carr mai, he \$9,000 ka nui. Aia ia kālā ma kekahi waihona panakō waiwai noho kahu, i hiki ke ho'ohana 'ia no nā kākī FestPAC 'oko'a. I kēia manawa, ke ho'olilo 'ia nei ma kahi \$130 o ka mahina, no Strategies 360 no ka ho'oholo 'ana i ke kahuapa'a FestPAC.

Wahi a ka Luna Ho'omalulu, pono ke Komikina e 'āpono i ke kālā i ho'olilo 'ia no ka hai 'ana i Luna Ho'olaule'a kūikawā, na HTA a me NaHHA e ho'olilo i ke kālā.

Nīnau 'o Mr. Onishi inā ua lawa paha ke kālā ma ka mo'omō'ali kālā, a i 'ole paha inā pono e ho'olālā hou 'ia paha ka mo'omō'ali kālā. Ua hāpai 'o ia i ka mana'o no ke emi nui mai o ke kālā e uku 'ia ana ka Luna Ho'olaule'a mai ka mea e wala'au 'ia nei i kēia manawa. 'Ae like ka Luna Ho'omalulu i ka mana'o e nānā a ho'oholo hou i ka nui kālā e uku ai i ka Luna Ho'olaule'a, e like nō me nā mana'o i hāpai 'ia e ka hui PIG. Ua nīnau pū 'o Mr. Onishi no ke kūlana Ho'omōhala Ka'akālai Ho'oulu Waihona Kālā. Ho'omōakāka mai ka Luna Ho'omalulu no ka uku 'ēkena 'ia o ke kanaka Ho'omōhala Ka'akālai Ho'oulu Waihona Kālā; e uku 'ia 'o ia kekahi pākēneka o ke kālā mai ke kālā i ho'oulu 'ia.

'Ōlelo akula 'o Mr. Keohokālōle no ko ka hui PIG 'i'ini e hai a ho'omākaukau i ka Luna Ho'olaule'a ma mua o ka pau 'ana o kēia makahiki (2021), 'oia, ke hō'ea ke kauwela o ka makahiki 2022, he 18 ona mau māhina e ho'oulu kālā ai.

Hopohopo 'o Mr. Onishi e pili ana i ka hai 'ia o kekahi kanaka Ho'omōhala Ka'akālai Waihona Ho'oulu Kālā, e aho paha ko ke Komikina kōkua 'ana ma ka hai 'ana i ia kanaka. E 'āpono paha

Mo'olelo Hālāwai o ke Kōmike no ka Ho'olaule'a No'eau A Mo'omeheu Pākīpika 13
Pō'akahi, 23 Aukake, 2021 hola 2:30'aiu ma o ka ZOOM
'Ao'ao 7 o 7

ke Komikina i ke kanaka no ia kūlana, ma o ke koho pāloka paha, me ke kōkua pū ma ke koho 'ana i ka moho kūpono no ke kūlana, 'a'ole e kauka'i nui ma ka Luna Ho'olaule'a e koho i moho kūpono. 'Oiai e hā'awi 'ia ana ke kālā iā mākou mai nā kānaka a pā'oihana like 'ole, he pono ko ke Komikina maopopo 'ana pehea e ho'ohana 'ia nei ke kālā.

'Ōlelo maila 'o Ms. Ah Nee-Benham, ma kekahi o nā kūkōhu i ho'ohua 'ia, ua kaha 'ia he laina mai ke Komikina i ka Luna Ho'olaule'a. Eia na'e, aia he laina i kaha 'ia ma waena o ka Luna Ho'olaule'a a me ka mea Ho'omōhala Ka'akālai Waihona Ho'oulu Kālā ma ia kūkōhu kekahi. Wahi a Mr. Onishi, 'o ka mana'o nui o kāna e ho'opuka nei, 'o ia ho'i, ko ke Komikina ho'okele 'ana i ke ka'ina hana o ka hai 'ana. Ha'i mai 'o Ms. Ah Nee-Benham, e kōkua ka Luna Ho'olaule'a (ka mea kūikawā ho'i) me kēia hana.

'ŌLELO HŌ'IKE A KA LEHULEHU

Wehe ka Luna Ho'omalua Ka'anā'nā i ka hālāwai i ka lehulehu e hāpai mana'o. 'Oiai 'a'ohē mea i ho'opuka 'ia, ho'opa'a 'ana i kekahi hālāwai.

NĀ HO'OLAHA

'A'ohē mea i ho'olaha 'ia.


KA HO'OPA'A HĀLĀWAI – PŌ'AKAHI, 13 KEPAKEMAPA 2021

Ua ho'oholo 'ia e ho'opa'a 'ia ka hālāwai Komikina hou ma Kepakemapa 7, 2021. E kāpai 'ia ka hālāwai ma Kepakemapa 13, 2021, a 'o ka hālāwai ma Kepakemapa 27, 2021, he hālāwai hapahā ia.

HO'OKU'U

Ho'oku'u 'o Luna Ho'omalua Ka'anā'anā i ka hālāwai ma ka hola 3:25'aiu.

Me ke aloha e waiho 'ia nei,



Kalani Ka'anā'anā
Luna Ho'omalua

08/26/2021
Lā